

# «Jau hai respect da mes nov pensum»

Bravuogn: Radunanza generala da la Viafier retica

DA GION NUTEGN STGIER / ANR

■ **L'emna proxima surpiglia Reto Fasciati il timun da la Viafier retica. Venderdi è il nov directur vegnì beneventà e quai a chaschun da la radunanza generala dal manaschi cun passa 1300 emploiads. I saja per el sco Grischun ina gronda onur da surpigliar quella incumbensa.**

Grond interess per la 128avla radunanza generala da la Viafier retica venderdi a Bravuogn. Preschents eran 400 acziunaris e vers 60 giasts da la politica, da l'economia e dal turissem. En ses pled da bainvegni ha *Stefan Engler*, il president dal cussegl d'administraziun, ditg che Bravuogn saja il «Mekka» dals amis da la viafier e quai da l'entir mund. Il Museum da la viafier ed il plazzal dal tunnel d'Alvra sveglian in grond interess e quai da vegl e giuven. Er sch'il travagl haja gi in bun e stabil onn na saja l'opziun da cuntinuar sco fin ussa betg la dretga via, ha accentuà il cusseglier dals chantuns e president dal cussegl d'administraziun da la Viafier retica.

## Damain passagiers tar las duas perlas da la Viafier retica

Da la realitad dal ferm franc svizzer ha er la Viafier retica patì cun sa reducir la svieuta dal traffic da persunas per stgars quatter milliuns francs sin da nov 93,9 milliuns francs. Las duas perlas da la Viafier retica, il «Glacier Express» ed il «Bernina Express», han gi considerablmain damain giasts cun mancar cunzunt er ils turists da la Germania. Cun acziuns spezialas, cun anc in meglier servis, cun vegnir anc pli manaivel als clients, tgirar ils giasts



Il president dal cussegl d'administraziun, il nov directur ed il vicedirectur da la Viafier retica: **Stefan Engler, Renato Fasciati e Christian Florin (da san.)**

FOTO G. N. STGIER

stabels e modernisar l'infrastructura duessan las duas perlas daventar anc pli attractivas.

## Investiziuns per 214 milliuns francs

Insumma saja da far anc in marketing pli professiunal, adattar ils products a la fiera ed er quai che pertutga la digitalisaziun generala bler pi activ, ha

ditg Engler. Fatg ha il travagl da la Viafier retica l'onni passà ina svieuta da prest 376 milliuns francs, sa resultà è in resultat da manaschi da 2,8 milliuns francs ed a la fin ha la Viafier retica scrit in gudogn da 136 000 francs. Investiziuns èn vegnidas fatgas per ina summa da 214 milliuns francs e quai en spezial per mantegnair la substan-

za e lura er per nov material. Las grondas summas èn vegnidas investadas per il tunnel d'Alvra e per la staziun da San Murezzan. La Viafier retica saja er economicamain ina ferma pitga en il Grischun e quai duess ella er restar en l'avegnir, tiers las fitg grondas sfidas, ha menziunà il president dal cussegl d'administraziun. Investà vegn er en

l'avegnir cun la cumpra da 27 novs trens per ils quals la confederaziun ha gia dà glisch verda per in sustegn.

## Meglra collavuraziun cun la politica, il turissem e l'economia

Pleds simpatics èn er vegnids da *Peter Nicolay*, il president da la vischnanca da Bravuogn. La viafier saja per il lieu e per la regiun da gronda valur ed impurtant sco strusch ina autra instituziun. Losch da la «pitschna cotschna» è er il nov directur *Renato Fasciati* e successur da *Hans Amacker*. A l'entschatta ha el engrazià als commembers da la direcziun e cunzunt a *Christian Florin*, el che ha il davos onn manà serius il manaschi sco substitut da Hans Amacker per la buna introducziun en il travagl. «I saja ina gronda onur sco Grischun, Engiadinais, ami da la viafier e turisticher da surpigliar la direcziun da la Viafier retica», ha ditg Fasciati a las passa 400 persunas preschentas.

## Reelecziun dal cussegl d'administraziun

El haja però er in tschert respect da ses nov pensum e saja pertschert che la Viafier retica saja en il Grischun ina instituziun ed in travagl connectà en tut las regiuns da noss chantun, ha ditg Fasciati. El vul cunzunt er intensivar la collavuraziun cun il chantun e la confederaziun, cun la politica, il turissem e l'economia. Confermads en lur uffizi èn vegnids Stefan Engler e *Paul Blumenthal*, els dus che represchentan il chantun en il cussegl d'administraziun. Vinavant da quel gremium fan er part *Benno Burtscher*, *Tarzisius Caviezel*, *Heinz Dudli*, *Hans-Jürg Spillmann* ed *Andreas Thöny*.